

四庫全書

集部

欽定四庫全書

樂府詩集卷十八

宋 郭茂倩 輯

鼓吹曲辭

漢 鏡歌下

雉子班

吳 均

可憐雉子班
羣飛集野甸
文章始陸離
意氣已驚悁
幽并遊俠子
直心亦如箭
死節報君恩
一作以死
誰能孤

思眇

同前

陳後主

四野秋原暗十步啄方前
雉聲風處遠翅影雲間連
箭射妖姬笑裘值盛明然
已足南皮賞復會北宮篇

同前

張正見

陳蒼雉未飛斂翮依芳甸
朱冠色尚淺錦臆毛初變
雉麥且專場排花聊勇戰
唯當渡弱水不怯如皋箭

同前

毛處約

春物始芳菲春雉正相追澗響連朝雉花光帶錦衣竄
跡時移影驚媒或亂飛能使如臯路相逢巧笑歸

同前

江總

麥壘新秋來澤雉屢徘徊依花似協妬拂草乍驚媒三
春桃照李二月柳爭梅暫往如臯路當令巧笑開

同前

李白

古今樂錄曰梁三朝樂第四十一設辟邪
伎鼓吹作雉子班曲引去來

辟邪伎作鼓吹驚雉子班之奏曲成喔咿振迅欲飛鳴
扇錦翼雄風生雙雌同飲啄趨悍誰能爭乍向草中耿
介死不求黃金籠下生天地至廣大何惜遂物情善卷
讓天子務光亦逃名所貴曠士懷朗然合太清

臨高臺

魏文帝

臨臺行高高以軒下有水清且寒中有黃鵠往且翻行
為臣當盡忠願令皇帝陛下三千歲宜居此宮鵠欲南
遊雌不能隨我欲躬銜汝口噤不能開欲負之毛衣摧

頽五里一顧六里徘徊

同前

謝朓

千里常思歸登臺臨綺翼纔見孤鳥還未辨連山極四面動春風朝夜起寒色誰知倦遊者嗟此故鄉憶

同前

王融

遊人欲聘望積步上高臺井蓮當夏吐窓桂逐秋開花飛低不入鳥散遠時來還看雲棟一作陣影含月共徘徊

同前

簡文帝

高臺半行雲望望高不極草樹無參差山河同一色
髣髴洛陽道道遠難別識玉階故情人情來共相憶

同前

沈約

高臺不可望望遠使人愁連山無斷續河水復悠悠
所思暖何在洛陽南陌頭可望不可至何用解人憂

同前

陳後主

晚景登高臺迴

一作迴

望春光來霧濃山後暗日落雲傍

開烟裏看鴻小風來望葉回臨窻已響吹極眺且傾杯

同前

張正見

曾臺通清漢出迴架重欂飛棟臨黃鶴高窓度白雲風

前朱幌

一作慢

色霞處綺疎分此中多怨曲地遠詎能聞

同前

蕭慤

崇臺高百尺迴出望仙宮畫棋浮朝

一作雲

氣飛梁照晚

虹小衫飄霧縠艷粉拂輕紅笙吹汶陽篠琴奏嶧山桐
舞逐飛龍引花隨少女風臨春今若此極燕豈無窮

同前

褚亮

高臺暫俯臨飛翼聳輕音浮光隨日度漾影逐波深迴
瞰周平野開懷暢遠襟獨此三休上還傷千歲心

同前

王勃

臨高臺高臺迢遞絕浮埃瑤軒綺構何崔嵬鸞歌鳳吹
清且哀俯瞰長安道萋萋御溝草斜對甘泉路蒼蒼茂
陵樹高臺四望同帝鄉佳氣鬱蔥蔥紫閣丹樓紛照曜
壁房錦殿相玲瓏東彌長樂觀西指未央宮赤城映朝
日綠樹搖春風旗亭百隊開新市甲第千甍分戚里朱

輪翠蓋不勝春疊樹層

一作重

楹相對起復有青樓大道

中繡戶文窓雕綺櫺錦衣畫不縈羅幃夕床空歌屏朝
揜翠粧鏡晚窺紅為吾安寶髻蛾看罷花叢狹路塵間
黯將暮雲間月色明如素鴛鴦池上兩兩飛鳳凰樓下
雙雙度物色正如此佳期那不顧銀鞍繡轂盛繁華可
憐今夜宿倡家倡家少婦不須嚔東園桃李片時春君
看舊日高臺處柏梁銅雀生黃塵

同前

僧貫休

涼風吹遠念使我升高臺寧知數片雲不是舊山來故人天一涯久客殊未回雁來不得書空寄聲哀哀

遠期

張率

遠期終不歸節物坐將

遠一作

變白露愴單衫秋風息團

扇誰能久離別他鄉且異縣浮雲蔽重山相望何時見寄言遠期者空閨淚如霰

同前

庾成師

憶別春花飛已見秋葉稀淚粉羞明鏡愁帶減寬衣得

書言未及夢見道應歸坐使紅顏歇獨掩青樓扉

玄雲

張率

壞陣壓峨壘遮牕暗思扉映日斜生海跨樹似鵬飛夢
山安已去落靨何由歸

黃雀行

莊南傑

穿屋穿牆不知止爭樹爭巢入營死林間公子挾彈弓
一丸致斃花叢裏小雛黃口未有知青天不解高高飛
虞人設網得要路白日啾嘲禍萬機

釣竿

魏文帝

崔豹古今注曰釣竿者伯常子避仇河濱
為漁者其妻思之而作也每至河側輒歌
之後司馬相如作釣竿詩遂傳為樂曲

東越河濟水遙望大海涯釣竿何珊珊魚尾何筵筵行
路之好者芳餌欲何為

同前

沈約

桂舟既容與綠浦復回紆輕絲動弱芰微楫起單鳧扣

舷忘日暮卒歲以為娛

同前

戴嵩

試持玄渚釣塹罷池陽獵翠羽飾長綸
渠花裝小綵鉅利斷蓴絲汎舉牽菱葉
聊載前魚童過看後舟妾

同前

劉孝綽

釣舟畫采鷁魚子服冰紈金轄茱萸網
銀鈎翡翠竿欽橈隨水脉急漿渡江湍
湍長自不辭前浦有佳期船交棹影合
浦深魚出遲荷根時觸餌菱芒下宵絲
連渡江

南手衣渝京兆省垂竿自來樂誰能為太師

釣竿篇

張正見

結宇長江側垂釣廣川
潯竹竿橫翡翠桂髓擲黃金
人來水鳥沒檝渡岸花沈
蓮搖見漁近綸盡覺潭深
渭水終湏卜滄浪徒自吟
空嗟芳餌下獨見有貪心

同前

李巨仁

潺湲面江海滉漾矚波瀾
不惜黃金餌唯憐翡翠竿
斜綸控急水定檝下飛湍
潭迴一作風來易川長霧歇難

寄言朝市客滄浪徒自安

同前

沈佺期

朝日歛紅烟垂竿向綠川人疑天上坐魚似鏡中懸
避楫時驚透猜鉤每誤牽湍危不理轄潭靜欲留船釣玉
君徒尚徵金我未賢為看芳一作方餌下貪得會無全

魏鼓吹曲

繆襲

晉書樂志曰魏武帝使繆襲造鼓吹十二
曲以代漢曲一曰楚之平二曰戰滎陽三

曰獲呂布四曰克官渡五曰舊邦六曰定
武功七曰屠柳城八曰平南荆九曰平關
中十曰應帝期十一曰邕熙十二曰太和
楚之平

晉書樂志曰改漢朱鷺為楚之平言魏也
古今樂錄作初之平

楚之平義兵征神武奮金鼓鳴邁武德揚漢名漢室敬
社稷傾皇道失桓與靈閭官熾羣雄爭邊韓起亂金城

中國擾無紀經赫武皇起旗旌麾天下天下平濟九州
九州寧創武功武功成越五常邈三王興禮樂定紀綱
普日月齊輝光

楚之平曲凡三十句句三字

戰滎陽

晉書樂志曰改魏思悲翁為戰滎陽言曹
公也

戰滎陽汴水陂戎士憤怒貫甲馳陣未成退徐滎二萬

騎斬壘平戎馬傷六軍驚勢不集衆幾傾白日沒時晦
冥顧中年心屏營同盟疑計無成賴我武皇萬國寧

戰榮陽曲凡二十句其十八句句三字

二句句四字

獲呂布

晉書樂志曰改漢艾如張為獲呂布言曹
公東園臨淮生擒呂布也

獲呂布戮陳宮艾夷鯨鯢驅騁羣雄囊括天下運掌中

獲呂布曲凡六句其三句句三字三句
句四字

克官渡

晉書樂志曰改漢上之回為克官渡言曹
公與袁紹戰破之於官渡也

克紹官渡由白馬僵屍流血被原野賊衆如犬羊王師
尚寡沙埽旁風飛揚轉戰不利士卒傷今日不勝後何
望土山地道不可當卒勝大捷震冀方屠城破邑神武

遂章

克官渡曲凡十八句其八句句四字一
句五字九句句三字

舊邦

晉書樂志曰改漢翁離為舊邦言曹公勝
袁紹公官渡還譙收藏死亡士卒也

舊邦蕭條心傷悲孤魂翩翩當何依
述士戀故涕如摧
兵起事大令願違傳求親戚在者誰
立廟置後魂來歸

舊邦曲凡十二句其六句句三字六句
句四字

定武功

晉書樂志曰改漢戰城南為定武功言曹
公初破鄴武功之定始乎此也

定武功濟黃河河水湯湯旦暮有橫流波表氏欲衰兄
弟尋干戈決漳水水流滂沱嗟城中如流魚誰能復顧
室家計窮慮盡求來連和不時心中憂戚賊衆內潰

君奔奔北拔鄴城奄有魏國王業艱難覽觀古今可為
長歎

定武功曲凡二十一一句其五句句三字
三句句六字十二句句四字一句五字

屠柳城

晉書樂志曰改漢巫山高為屠柳城言曹
公越北塞歷白檀破三郡烏桓於柳城也

屠柳城功誠難越度隴塞路漫漫北踰岡平但聞悲風

正酸蹋頓授首遂登白狼山神武懋海外永無北顧患
屠柳城曲凡十句其三句句三字三句
句四字三句句五字一句六字

平南荆

晉書樂志曰改漢上陵為平南荆言曹公
南平荆州也

南荆何遼遼江漢濁不清菁茅久不貢王師赫南征劉
琮據襄陽賊備屯樊城六軍廬新野金鼓震天庭劉子

面縛至武皇許

一作許

其成許與其成撫其民陶陶江漢

間普為大魏臣大魏臣向風思自新思自新齊功古人在昔虞與唐大魏得與均多選忠義士為喉脣天下一
定萬世無風塵

平南荆曲凡二十四句其十七句句五
字四句句三字三句句四字

平關中

晉書樂志曰改漢將進酒為平關中言曹

公征馬超定關中也

平關中路向幢濟濁水立高墉關韓馬離羣凶選驍騎
縱兩翼虜崩潰級萬億

平關中曲凡十句句三字

應帝期

晉書樂志曰改漢有所思為應帝期言文
帝以聖德受命應運期也

應帝期於昭我文皇歷數承天序龍飛自許昌聰明昭

四表恩德動遐方星辰為垂耀日月為重光河洛吐符
瑞草木挺嘉祥麒麟步郊野黃龍遊津梁白虎依山林
鳳凰鳴高岡考圖定篇籍功配上古義皇義皇無遺文
仁聖相因循期運三千歲一生聖明君堯授舜萬國萬
國皆附親四門為穆穆教化常如神大魏興盛一作聖與
之為鄰

應帝期曲凡二十六句其一句三字二
句句四字二十二句句五字一句六字

邕熙

晉書樂志曰改漢芳樹為邕熙言魏氏臨其國君臣邕穆庶績咸熙也

邕熙君臣念德天下治登帝道獲瑞寶頌聲並作洋洋浩浩吉日臨高堂置酒列名倡歌聲一何紆餘雜笙簧八音諧有紀綱子孫永建萬國壽考樂未央

邕熙曲凡十五句其六句句三字三句句四字一句二字三句句五字二句句六字

太和

晉書樂志曰改漢上邪為太和言明帝繼體承統太和改元德澤流布也

惟太和元年皇帝踐阼聖且仁德澤為流布災蝗一時為絕息上天時雨露五穀溢田疇四民相率遵軌度事務徵清天下獄訟察以情元首明魏家如此那得不太平

太和曲凡十三句其二句句三字五句

句五字三句句四字三句句七字

吳鼓吹曲

韋昭

晉書樂志曰吳使韋昭製鼓吹十二曲一
曰炎精缺二曰漢之季三曰攄武師四曰
伐烏林五曰秋風六曰克皖城七曰關背
德八曰通荆門九曰章洪德十曰從歷數
十一曰承天命十二曰玄化

炎精缺

古今樂錄曰炎精缺者言漢室衰孫堅奮
迅猛志念在匡救王迹始乎此也當漢朱
鷺

炎精缺漢道微皇綱弛政德違衆姦熾民罔依赫武烈
越龍飛陟天衢耀靈威鳴雷鼓抗電麾撫乾衡鎮地機
厲虎旅騁熊羆發神聽吐英奇張角破邊韓羈宛穎平
南土綏神武章渥澤施金聲震仁風馳顯高門啓皇
基統罔極垂將來

炎精缺曲凡三十句句三字

漢之季

古今樂錄曰漢之季者言孫堅悼漢之微
痛董卓之亂興兵奮擊功蓋海內也當漢
思悲翁

漢之季董卓亂
柏柏武烈應時運
義兵興雲旗建
厲六師羅八陣
飛鳴鏑接白刃
輕騎發介士奮
醜虜震使衆
散劫漢主遷西
館雄豪怒元惡
憤赫赫皇祖功
名聞

漢之李曲凡二十句其十八句句三字
二句句四字

攄武師

古今樂錄曰攄武師者言孫權卒父之業
而征伐也當漢艾如張

攄武師斬黃祖捕夷凶族革平西夏炎炎大烈震天下
攄武師曲凡六句其三句句三字三句
句四字

伐烏林

古今樂錄曰伐烏林者言魏武既破荊州
順流東下欲來爭鋒孫權命將周瑜逆擊
之於烏林而破走也當漢上之回

曹操北伐拔柝城乘勝席卷遂南征劉氏不睦八郡震
驚衆既降操屠荊舟車十萬揚風聲議者狐疑慮無成
賴我大皇發聖明虎臣雄烈周與程破操烏林顯章功
名

伐烏林曲凡十八句其十句句四字八
句句三字

秋風

古今樂錄曰秋風者言孫權悅以使民
忘其死也當漢擁離

秋風揚沙塵寒露沾衣裳角弓持弦急鳩鳥化為鷹邊
垂飛羽檄寇賊侵界疆跨馬披介冑慷慨懷悲傷辭親
向長路安知存與亡窮達固有分志士思立功思立功

邀之戰場身逆獲高賞身沒有遺封

秋風曲凡十六句其十四句句五字一
句三字一句四字

克皖城

古今樂錄曰克皖城者言魏武志圖并兼
而令朱光為廬江太守孫權親征光破之
於皖城也當漢戰城南

克滅皖城遏寇賊惡此凶孽阻姦慝王師赫征衆傾覆

除穢去暴戢兵革民得就農邊境息誅君弔臣昭至德
克皖城曲凡十二句其六句句三字六
句句四字

關背德

古今樂錄曰關背德者言蜀將關羽背棄
吳德心懷不軌孫權引師浮江而擒之也
當漢巫山高

關背德作鴟張割我邑城圖不祥稱兵北伐圍樊襄陽

嗟臂大於股將受其殃巍巍夫聖主睿德與玄通與玄
通親任呂蒙泛舟洪池溯涉長江神武一何相相聲
烈正與風翔歷撫江安城大據郢邦虜羽授首百蠻咸
來同盛哉三比隆

關背德曲凡二十一句其八句句四字
二句句六字七句句五字四句句三字

通荆門

古今樂錄曰通荆門者言孫權與蜀交好

齊盟中有關羽自失之僞戎蠻樂亂生亂
作患蜀疑其眩吳惡其詐乃大治兵終復
初好也當漢上陵

荆門限巫山高峻與雲連蠻夷阻其險歷世懷不賓漢
王據蜀郡崇好結和親乖微中情疑讒夫亂其間大皇
赫斯一作斯怒虎臣勇氣震蕩祿幽藪討不恭觀兵揚炎

耀厲鋒整封疆整封疆闡揚威武容功赫戲洪烈炳章
邈矣帝皇世聖吳同厥風荒裔望清化化恢弘煌煌大

吳延祚永未央

通荆門曲凡二十四句其十七句句五
字四句句三字三句句四字

章洪德

古今樂錄曰章洪德者言孫權章其大德
而遠方來附也當漢將進酒

章洪德邁威神感殊風懷遠鄰平南裔齊海濱越裳貢
扶南臣珍貨充庭所見日新

章洪德曲凡十句句其八句句三字二句

句四字

從歷數

古今樂錄曰從歷數者言孫權從圖籙之符而建大號也當漢有所思

從歷數於穆皇皇帝聖哲受之天神明表奇異建號創
皇基聰睿協神思德澤浸及昆蟲浩蕩越前代三光顯
精耀陰陽稱至治肉肉步郊畛鳳凰棲靈囿神龜遊沼

池圖識篆文字黃龍覲鱗符祥日月記覽往以察今我
皇多噲事上欽昊天象下副萬民意光被彌蒼生家戶
蒙惠賚風教肅以平頌聲章嘉喜大興隆綽有餘裕

從厯數曲凡二十六句其一句三字三
句句四字二十二句句五字一句六字

承天命

古今樂錄曰承天命者言上以聖德踐位
道化至盛也當漢芳樹

承天命於昭聖德三精垂象符靈表德巨石立九穗植
龍金其鱗烏赤其色與人歌億夫歎息起龍升龔帝服
窮淳懿體玄嘿夙興臨朝勞謙日昃易簡以崇仁放遠
讒與愚舉賢才親近有德均田疇茂稼穡審法令定品
式考功能明黜陟人思自盡唯心與力家國治王道直
思我帝皇壽萬億長保天祿祚無疆

承天命曲凡三十四句其十九句句三
字二句句五字十三句句四字


玄化

古今樂錄曰玄化者言上修文訓武則天而行仁澤流洽天下喜樂也當漢上邪

玄化象以天陛下聖真張皇綱率道以安民惠澤宣流而雲布上下睦親君臣酣宴樂激發絃歌揚妙新修文籌廟勝須時備駕巡洛津康哉泰四海歡忻越與三五鄰

玄化曲凡十三句其五句句五字二句

句三字三句句四字三句句七字



樂府詩集卷十八

欽定四庫全書

集部

樂府詩集卷

十九
二十

詳校官庶吉士臣柳邁祖

助教臣常循覆勘

總校官知縣臣繆琪

校對官編修臣秦瀛

謄錄監生臣孫承基

欽定四庫全書

樂府詩集卷十九

宋 郭茂倩輯

鼓吹曲辭

晉鼓吹曲

傅玄

晉書樂志曰武帝令傅元製鼓吹曲二十
二篇以代魏曲一曰靈之祥二曰宣受命
三曰征遼東四曰宣輔政五曰時運多難

六曰景龍飛七曰平玉衡八曰文皇統百
揆九曰因時運十曰惟庸蜀十一曰天序
十二曰大晉承運期十三曰金靈運十四
曰於穆我皇十五曰仲春振旅十六曰夏
苗田十七曰仲秋獮田十八曰順天道十
九曰唐堯二十曰玄雲二十一曰伯益二
十二曰鈞竿

靈之祥

古朱鷺行古今樂錄曰靈之祥言宣皇帝
之佐魏猶虞舜之事堯也既有石瑞之徵
又能用武以誅孟度之逆命也

靈之祥石瑞章旌金德出西方天降命授宣皇應期運
時龍驤繼大舜佐陶唐讚武文建帝綱孟氏叛據南疆
追有扈亂五常吳寇勁蜀虜彊交誓盟連遐荒宣赫怒
奮鷹揚震乾威曜電光陵九天陷石城梟逆命拯有生
萬國安四海寧

宣受命

古思翁翁行古今樂錄曰宣受命言宣皇
帝禦諸葛亮養威重運神兵亮震怖而死
宣受命應天機風雲時動神龍飛禦葛亮鎮雍梁邊境
安夷夏康務節事勤定傾攬英雄保持盈淵穆穆赫明
明冲而泰天之經養威重運神兵亮乃震斃一作死天下
寧

征遼東

古艾而張行古今樂錄曰征遼東言宣皇
帝陵大海之表討滅公孫淵而梟其首也
征遼東敵失據威靈邁日域公孫既授首羣逆破膽咸
震怖朔北響應海表景附武功赫赫德雲布

宣輔政

古上之回行古今樂錄曰言宣皇帝聖道
深遠撥亂反正網羅文武之才以定二儀
之序也

宣皇輔政聖烈深撥亂反正從天心網羅文武才慎厥
所生所生賢遺教施安上治民化風移肇創帝基洪業
垂於鑠明明時赫戲功濟萬世定二儀雲澤雨施海外
風馳

時運多難

古擁離行古今樂錄曰時運多難言宣皇
帝致討吳方有征無戰也

時運多難道教痛天地變化有盈虛蠢爾吳蠻虎視江

湖我皇赫斯致天誅有征無戰弭其圖天威橫被廓東隅

景龍飛

古戰城南行古今樂錄曰景龍飛言景帝
克明威教賞從夷逆祚隆無疆崇此洪基
也

景龍飛御天威聰鑒玄察動與神明協機從之者顯逆
之者滅夷文教敷武功巍普被四海萬邦望風莫不來

綏聖德潛斷先天弗違弗違祥享世永長猛以致寬道
化光赫明明祚隆無疆帝績惟期有命既集崇此洪基

平玉衡

古巫山高行古今樂錄曰平玉衡言景帝
一萬國之殊風齊四海之乖心禮賢養士
而纂洪業也

平玉衡紆姦回萬國殊風四海乖禮賢養士羈御英雄
思心齊纂戎洪業崇皇階品物咸亨聖敬日躋聰鑒盡

下情明明綜天機

文皇統百揆

古上陵行古今樂錄曰文皇統百揆言文
皇帝始統百揆用人有序以敷太平之化
也

文皇統百揆繼天理萬方武將鎮四隅英佐盈朝堂謀
言協秋蘭清風發其芳洪澤所漸潤礫石為珪璋大道
侔一作謀五帝盛德踰三王咸光大上參天與地並一作至

化無內外無內外六合並康又並康又邁茲嘉會在昔
義與農大晉德邁鎮征及諸州為蕃衛立功濟四海
洪烈流萬世

因時運

古將進酒行古今樂錄曰因時運言文皇
帝因時運變聖謀潛施解長蛇之交離羣
桀之黨以武濟文審其大計以邁其德也
因時運聖策施長蛇交解羣桀離勢窮奔吳虎騎厲惟

武進審大計時邁其德清一世

惟庸蜀

古有所思行古今樂錄曰惟庸蜀言文皇帝既平萬乘之蜀封建萬國復五等之爵也

惟庸蜀建號天一隅劉備逆帝命禪亮承其餘擁衆數十萬闕隙乘我虛驛騎進羽檄天下不遑居姜維屢寇邊隴上為荒蕪文皇愍斯民歷世受辜辜外謨番屏臣

內謀衆士夫爪牙應指授腹心獻一作同良圖良圖協成

丈大一作乃興百萬軍雷鼓震地起猛勢陵浮雲逋虜畏

天誅面縛造壘門萬里同風教逆命稱妾臣光建五等

紀綱天人

天序

古芳樹行古今樂錄曰天序言聖皇應歷
受禪洪濟大化用人各盡其才也

天序歷應受禪承靈祐御羣龍勒螭虎弘濟大化英雋

作輔明明統萬幾赫赫鎮四方咎繇稷契之疇協蘭芳
禮王臣覆兆民化之如天與地誰敢愛其身

大晉承運期

古上邪行古今樂錄曰大晉承運期言聖
皇應籙受圖化象神明也

大晉承運期德隆聖皇時清晏白日垂光應籙圖陟帝
位繼天正玉衡化行象神明至哉道隆虞與唐元首敷
洪化百寮股肱並忠良民大康隆隆赫赫福祚盈無疆

金靈運

古君馬黃行古今樂錄曰金靈運言聖皇
踐祚致敬宗廟而孝道行於天下也

金靈運天符發聖徵見參日月惟我皇體神聖受魏禪
應天命皇之興靈有徵登大麓御萬乘皇之輔若闕虎
爪牙奮莫之禦皇之佐讚清化百事理萬邦賀神祇應
嘉瑞章恭享禮薦先皇樂時奏磬管鏘鼓淵淵鍾煌煌
奠樽俎寶玉觴神歆饗咸悅康宴孫子祐無疆大孝烝

烝德教被萬方

於穆我皇

古雉子行古今樂錄曰於穆我皇言聖皇
受命德合神明也

於穆我皇盛德聖且明受禪君世光濟羣生普天率土
莫不來庭顯顯六合內望風仰泰清萬國雍雍興頌聲
大化洽地平而天成七政齊玉衡惟平峨峨佐命濟濟
羣英夙夜乾乾萬幾是經雖治興匪荒寧謙道光冲不

盈天地合德日月同榮赫赫煌煌曜幽冥三光克從於
顯天垂景星龍鳳臻甘露宵零肅神祇祇上帝靈萬物
戴自天効其成

仲春振旅

古聖人出行古今樂錄曰仲春振旅言大
晉申文武之教畋獵以時也

仲春振旅大致民武教於時日新師執提工執鼓巫作
從節有序盛矣允文允武蒐田表禡甲法誓遂圍禁獻

社祭允以時明國制文武並用禮之經列車如戰大教
明古今誰能去兵大晉繼天濟羣生

夏苗田

古臨高臺行古今樂錄曰夏苗田言大晉
畋狩順時為苗除害也

夏苗田運將徂軍國異容文武殊乃命羣吏換車徒辦
其號名讚契書王軍啓八門行同上帝居時路建大麾
雲旗翳紫虛百官象其事疾則疾徐則徐回衡旋軫罷

陳弊車獻禽享祠烝烝配有虞惟大晉德參兩儀化雲
敷

仲秋彌田

古遠期行古今樂錄曰仲秋彌田言大晉
雖有文德不廢武事順時以殺伐也

仲秋彌田金德常剛涼風清且厲凝露結為霜白臧司
辰蒼隼時鷹揚猶尚父順天以殺伐春伐春秋時叙雷
霆挺一作振威曜進退由征鼓致禽祀祊羽毛之用充軍

府赫赫大晉德芬烈陵三五敷化以文雖治不廢武光
宅四海永享天之祐

順天道

古石畱行古今樂錄曰順天道言仲冬大
閱用武修文大晉之德配天也

順天道握神契三時示講武事冬大閱鳴鐃振鼓鐸旌
旗象虹霓文制其中武不窮武動軍誓衆禮成而義舉
三驅以崇仁進止不失其序兵卒練將如闕虎惟闕虎

氣陵青雲解圍三面殺不殄羣偃旌麾班六軍獻享烝
修典文嘉大晉德配天祿報功爵侯賢饗燕樂受茲百
祿嘉萬年

唐堯

古務成行古今樂錄曰唐堯言聖皇陟帝
位德化光四表也

唐堯諮務成謙謙德所興積漸終光大履霜致堅冰神
明道自然河海猶可凝舜禹統百揆元凱以次升禪讓

應天歷睿聖世相承我皇陟帝位平衡正準繩德化飛
四表祥氣見其徵興王坐俟旦亡主一作恬一作自矜
致遠由近始覆簣成山陵披圖按先籍有其證靈液

玄雲

古玄雲行古今樂錄曰玄雲言聖皇用人
各盡其材也

玄雲起丘山祥氣萬里會龍飛何蜿蜿鳳翔何翩翩昔
在唐虞朝時見青雲際今親遊萬一作方國流光溢天外

鶴鳴在後園清音隨風邁成湯隆顯命伊摯來如飛周
文獵渭濱遂載呂望歸符合如影響先天天弗違輟耕
綜時綱解褐衿天維元功配二王芬馨世所稀我皇秩
羣才洪烈何巍巍桓桓征四表濟濟理萬幾神化感無
方髦才盈帝畿丕顯惟昧旦日新孔所咨茂哉明聖一作人
德日月同光輝

伯益

古黃爵行古今樂錄曰伯益言赤烏銜書

有周以興今聖皇受命神雀來也

伯益佐舜禹職掌山與川德侔十六相思心入無間智
理周萬物下知衆鳥言黃雀應清化翔集何翩翩和鳴
棲庭樹徘徊雲日間夏桀為無道密網施山河酷祝振
纖網當奈黃雀何殷湯崇天德去其三面羅道遙羣飛
來鳴聲乃復和朱雀作南宿鳳凰統羽羣赤烏銜書至
天命瑞周文神雀今來遊為我受命君嘉祥致天和膏
澤降青雲蘭風發芳氣闔世同其芬

釣竿

古釣竿行古今樂錄曰釣竿言聖皇德配堯舜又有呂望之佐以濟天功致太平也釣竿何冉冉甘餌芳且鮮臨川運思心微綸沉九淵太公寶此術乃在靈祕篇機變隨物移精妙貫未然游魚驚著釣潛龍飛戾天戾天安所至撫翼翔太清太清一何異兩儀出渾成玉衡正三辰造化賦羣形退願輔聖君與神合其靈我君弘遠略天人不足并天人初并時

昧昧何芒芒日月有徵兆文象興二皇蚩尤亂生民黃
帝用兵征萬方逮夏禹而德衰三代不及虞與唐我皇
聖德配堯舜受禪及祚享天祥率土蒙祐靡不肅庶事
康庶事康穆穆明明荷百祿保無極永泰平

晉凱歌二首

張華

命將出征歌

重華隆帝道戎蠻或不賓徐夷興有周鬼方亦違殷今
在盛明世寇虐動四垠豺狼染牙爪羣生號穹旻元帥

統方夏出車撫涼秦衆貞必以律臧否實在人威信加
殊類疎遜思自親單醪豈有味挾纊感至仁武功尚止
戈七德美安民遠跡由斯舉永世無風塵

勞還師歌

猘狁背天德構亂擾邦畿戎車震朔野羣帥贊皇威將
士齊心膂感義忘其私積勢如轡弩赴節如發機萬聲
動山谷金光耀素暉戎戟陵勁敵武步蹈橫屍鯨鯢皆
授首北土永清夷昔往冒隆暑今來白雲霏征夫信勤

痺自古詠采薇收榮於含爵燕喜在凱歸

宋鼓吹鐃歌三首

宋書樂志曰鼓吹鐃歌四篇今唯有上邪等三篇其一篇闕古今樂錄曰上邪曲四解晚芝曲九解漢曲有遠期疑是也艾如張三解沈約云樂人以音聲相傳訓詁不可復解凡古樂錄皆大字是辭細字是聲聲辭合爲故致然爾

大喝夜烏自云何來堂吾來聲烏奚姑悟姑尊盧聖子
黃尊來餽清鷺烏白日為隨來耶吾微令吾

應龍夜烏由道何來直子為烏奚如悟姑尊盧雞子聽
烏虎行為來明吾微令吾

詩則夜烏道祿何來黑洛道烏奚悟如尊爾尊盧起黃
華烏伯遼為國日忠雨令吾

伯遼烏烏若國何來日忠雨烏奚如悟姑尊盧面道康

尊錄一作錄龍永烏赫赫福祚夜音微令吾

右四解

晚芝曲

幾令吾幾令諸韓亂發正令吾

幾令吾諸韓從聽心令吾若里洛何來韓微令吾

尊盧忌盧文盧子路子路為路雞如文盧烟馬諸祚微
令吾

幾令諸韓或公隨令吾

幾令吾幾諸或言隨令吾黑洛何來諸韓微令吾

尊盧安成隨來免路路子為吾路奚如文盧炯烏諸祚
微令吾

幾令吾幾諸或言隨令吾

幾令吾諸或言幾苦黑洛何來諸韓微令吾

尊盧公汧隨來免路子路子為路奚姑文盧炯烏諸
祚微令吾

右九解

父如張曲

幾令吾呼歷舍居執來隨咄武子邪令烏銜針相風其
右其右

幾令吾呼羣議破萌執來隨吾咄武子邪令烏今烏今
臚入海相風及後

幾令吾呼無公赫吾執來隨吾咄武子邪令烏無公赫
吾裾立諸布始布

右三解

宋鼓吹鏡歌

何承天

宋書樂志曰鼓吹鐃歌十五篇何承天晉
義熙末私造一曰朱路二曰思悲公三曰
雍離四曰戰城南五曰巫山高六曰上陵
者七曰將進酒八曰君馬九曰芳樹十曰
有所思十一曰雉子遊原澤十二曰上邪
十三曰臨高臺十四曰遠期十五曰石流
按此諸曲皆承天私作疑未嘗被於歌也
雖有漢曲舊名大抵別增新意故其義與

古辭考之多不合云

悲公一作裴公

朱路篇

朱路揚和鸞翠蓋耀金華玄牡飾樊纓流旌拂飛霞雄
戟闢曠塗班劍翼高車三軍且莫喧聽我奏鏡歌清鞞
驚短簫朗鼓節鳴笳人心惟愷豫茲音亮且和輕風起
紅塵淳濶發微波逆韻騰天路積響結城阿仁聲被八
表威震振九遐嗟嗟介胄士勗哉念皇家

思悲公篇

思悲公懷衾衣東國何悲公西歸公西歸流二叔幼主
既悟偃禾復偃禾復聖志申營都新邑從斯民從斯民
德惟明制禮作樂興頌聲興頌聲致嘉祥鳴鳳爰集萬
國康萬國康猶弗已握髮吐食下羣士惟我君繼伊周
親覩盛世復何求

雍離篇

雍士多離心荆民懷怨情二凶不量德構難稱其兵王
人銜朝命正辭糾不庭上宰宣九伐萬里舉長旌樓船

掩江瀆駟介飛重英歸德戒後夫賈勇尚先鳴逆徒既不濟愚智亦相傾霜降未及染鄢郢忽已清西川無潛鱗北渚有奔鯨凌威致天府一戰夷三城江漢被美化宇宙歌太平惟我東郡民曾是深推誠

戰城南篇

戰城南衝黃塵丹旌電燄鼓雷震勅敵猛戎馬殷橫陣亘野若屯雲仗大順應三靈義之所感士忘生長劒擊繁弱鳴飛鏑炫晃亂奔星虎騎躍華旄旋朱火延起騰

飛烟驍雄斬高旗寧長角浮叫響清天夷羣寇殪逆徒
餘黎雪惠詠來蘇奏愷樂歸皇都班爵獻俘邦國娛

巫山高篇

巫山高三峡峻青壁千尋深谷萬仞崇巖冠靈林冥冥
山禽夜響晨猿相和鳴洪波迅復載逝載停悽悽商旅
之客懷苦情在昔陽九皇綱微李氏竊命宣武耀靈威
蠢爾逆縱復踐亂機王旅薄伐傳首來至京師古之為
國惟德是貴力戰而虐民鮮不顛墜矧乃叛戾伊胡能

遂咨爾巴子無放肆

上陵者篇

上陵者相追攀被服纖麗振綺紈攜童幼升崇巒南望
城闕鬱盤桓王公第通衢端高臺華屋列朱軒臨濬谷
採秋蘭士女悠奕映隰原拍營丘感牛山夾鳩既沒景
君歎嗟歲律逝不還志氣衰沮玄鬢斑野莽宿墳土乾
顧此纍纍中心酸生必死亦何怨取樂今日展情懽

將進酒篇

將進酒慶三朝備繁禮慶嘉有榮枯換霜霧交緩春帶
命朋僚車等旗馬齊鑣懷溫克樂林濠士失志慍情勞
思旨酒寄遊遨敗德人甘醇醪耽長夜或淫妖興屢舞
厲哇謠形傿傿聲號呶首既濡志亦荒性命天國家亡
嗟後生節酣觴匪酒辜孰為殃

君馬篇

君馬麗且閑揚鑣騰逆姿駿足躡流景高步追輕飛冉
冉六轡柔奕奕金華暉輕霄翼羽蓋長風靡淑旂願為

范氏驅雍容步中畿宜効詭遇子馳騁趣危機鉛陵策
良駟造父為之悲不怨吳坂峻但恨伯樂稀赦彼岐山
盜實濟韓原師奈何漢魏主縱情營所私疲民甘藜藿
廐馬患盈肥人畜賀厥養蒼生將焉歸

芳樹篇

芳樹生北庭豐隆正徘徊翠穎臨冬秀紅葩迎春開佳
人閑幽室惠心婉以諧蘭房掩綺幌綠草被長階日夕
遊雲際歸禽命同棲皓月盈素景涼風拂中閨哀絃理

虛堂要妙清且悽嘯歌流激楚傷此碩人懷梁塵集丹
帷微颺揚羅袿豈怨嘉時暮徒惜良願乖

有所思篇

有所思思昔人曾閔二子善養親和顏色奉昏晨至誠
烝烝通神明鄒孟軻為齊卿稱身受祿不貪榮道不用
獨擁楹三徙既諄禮義明飛鳥集猛獸附功成事畢乃
更娶哀我生遭凶旻幼罹荼酷備艱辛慈顏絕見無因
長懷永思託丘墳

雉子遊原澤篇

雉子遊原澤幼懷耿介心飲啄雖勤苦不願棲園林古
有避世士抗志清霄岑浩然寄卜肆揮棹通川陰逍遙
風塵外散髮撫鳴琴卿相非所盼何況於千金功名豈
不美寵辱亦相尋冰炭結六府憂虞纏胸襟當世須大
度量已不克任三復泉流誠自驚良已深

上邪篇

上邪下難正衆枉不可矯音和響必清端影緣直表大

化揚仁風齊人猶偃草聖王既已沒誰能弘至道開春
湛桑露代終肅嚴霜承平貴孔孟政敝侯申尚孝公明
賞罰六世猶克昌李斯肆濫刑秦氏所以亡漢宣隆中
興魏祖寧三方譬彼針與石效疾而稱良行葦非不厚
悠悠何詎央琴瑟時未調改絃當更張矧乃治天下此
要安可忘

臨高臺篇

臨高臺望天衢飄然輕舉陵太虛攜列子超帝鄉雲衣

雨帶乘風翔肅龍駕會瑤臺清暉浮景溢蓬萊濟西海
濯洧盤佇立雲岳結幽蘭馳迅風遊炎州願言桑梓思
舊遊傾霄蓋靡電旌降彼天塗積窈冥辭仙族歸人羣
懷忠抱義奉明君任窮達隨所遭何為遠想令心勞

遠期篇

遠期千里客肅駕候良辰近命城郭友具爾惟懿親高
門啓雙闥長筵列嘉賓中唐儻六佾三廟羅樂人簫管
激悲音羽毛揚華文金石響高宇絃歌動梁塵脩標多

巧捷九劔亦入神邊善自雅調成化由清均主人垂隆
慶羣士樂亡身願我聖明君邇期保萬春

石流篇

石上流水湔湔其波發源幽岫永歸長河瞻彼逝者歲
月其偕子在川上惟以增懷嗟我殷勤載勞寤寐邁此
百罹有志不遂行年倏忽長勤是嬰永言沒世悼茲無
成幸遇開泰沐浴嘉運緩帶安寢亦又何愠古之為仁
自求諸已虛情遙慕終於徒已

樂府詩集卷十九

欽定四庫全書

樂府詩集卷二十

宋 郭茂倩 輯

鼓吹曲辭

齊隨王鼓吹曲

謝朓

齊永明八年謝朓奉鎮西隨王教於荊州
道中作一曰元會曲二曰郊祀曲三曰釣
天曲四曰入朝曲五曰出藩曲六曰校獵

曲七曰從戎曲八曰送遠曲九曰登山曲
十曰泛水曲鈞天已上三曲頌帝功校獵
已上三曲頌藩曲

元會曲

二儀啓昌歷三陽

一作朝

應慶期珪瓚紛成序鞞譯憬來

思分階絕組練充庭羅翠旗觴流白
日下吹謚景雲滋

天儀穆藻殿萬寓壽

一作慶

皇基

郊祀曲

六宗禋祀岳五時奠甘泉整蹕遊九闕清簫開八壆鏘
鏘玉鑾動溶溶金陣旋郊宮光已屬音注升柴禮既虔福
響靈之集南岳固斯年

鈞天曲

史記曰趙簡子疾五日不知人居二日半
簡子寤語大夫曰我之帝所甚樂與百神
遊于鈞天廣樂九奏萬舞鈞天之名蓋取
諸此

高宴浩天臺置酒迎風觀笙鏞禮百神鍾石動雲漢瑤

臺

一作堂

琴

一作寶

瑟驚綺席舞衣散威鳳來參差玄鶴起

一作去

流亂已慶明庭樂詎慙南風彈

入朝曲

江南佳麗地金陵帝王州逶迤帶綠水迢遞起朱樓飛
甍夾馳道垂楊陰御溝凝笳翼高蓋疊鼓送華輶獻納
雲臺表功名良可收

出藩曲

雲披紫微內分組承明阿飛蝗游

一作遊

極浦旌節去關

河眇眇蒼山色沉沉遠

一作寒

水波鏡音巴渝曲簫管盛

唐歌夫君邁遺德江漢仰清和

校獵曲

凝霜冬十月殺盛涼飈哀

一作開

原澤曠千里騰綺紛

一作

絡

往來平置望烟合烈火從風迴殪獸華容浦張樂荆

山臺虞人昔有諭明明時戒哉

從戎曲

送旅亂輾轅彌節赴一作超河源日起霜戈照風迴連騎

翻紅塵朝夜合黃河萬里昏寥戾清笳轉蕭條邊馬煩
自勉輟耕願征役去何言

送遠曲

北梁辭歡宴南浦送佳人方衢控龍馬平路騁朱輪瓊
筵妙舞絕桂席羽觴陳白雲邱陵遠山川時未因一為
清吹激潺湲傷別巾

登山曲

天明開秀嶠，瀾光媚碧隄。風盪飄鶯辭。

一作翻鶯行

雲華

一作

飛行芳樹低，暮春春服美。游駕凌

一作躡

丹

一作石

梯升嶠，既

小魯登巒，且悵齊王孫。尚游衍，蕙草正萋萋。

泛水曲

玉露

一作霜

霑翠葉，金風鳴素枝。罷遊平樂苑，泛鷁昆明

池。旌

一作羽

旗散容裔，簫管

一作鼓

吹參差。日月厭遵渚，採

菱贈清漪。百年如流水，寸心寧共知。

齊鼓吹曲

入朝曲

李白

金陵控海浦，綠水帶吳京。
鏡歌列騎吹，颯沓引公卿。
槌鍾速嚴妝，伐鼓啟重城。
天子憑玉案，劍履若雲行。
日出照萬戶，簪裾爛明星。
朝罷沐浴間，遨遊閭風亭。
濟濟雙闕下，歡樂恩榮。

送遠曲

張籍

戲馬臺南山簇簇，山邊飲酒歌別曲。
行人醉後起登車，席上回樽勸僮僕。
青天漫漫覆長路，遠遊無家安得住。

願君到處自題名他日知君從此去

泛水曲

載酒入烟浦方舟泛綠波水酌我復飲子飲我還歌蓮
深微路通峰曲幽氣多閑芳無畱瞬弄桂不停柯水上
秋月鮮西山碧我我茲歡良可貴誰復更來過

梁鼓吹曲

沈約

隋書樂志曰梁高祖制鼓吹新歌十二曲
一曰木紀謝二曰賢首山三曰桐柏山四

卷二十
曰道亡五曰忱威六曰漢東流七曰鶴樓
峻八曰昏主恣淫慝九曰石首局十曰期
運集十一曰於穆十二曰惟大梁

木紀謝

隋書樂志曰漢第一曲朱鷺改為木紀謝
言齊謝梁升也

木紀謝火

一作炎

運昌炳南陸耀炎光民去癸鼎歸梁鮫

魚出慶雲翔籟五帝軼三王德無外化溥將仁蕩蕩義

湯湯浸金石達昊蒼橫四海被八荒舞千戚垂衣裳對
天眷坐巖廊肩有錫祚無疆風教遠禮容盛感人神宣
舞詠降繁祉延嘉慶

賢首山

隋書樂志曰漢第二曲思悲翁改為賢首
山言武帝破魏軍於司部肇王迹也

賢首山險而峻乘峴憑臨胡陣騁奇謀一作謨奮卒徒斷

白馬塞飛狐殪日逐殲骨都刃谷蠡馘林胡草既潤原

亦塗輪無反幕有烏掃殘孽震戎逋揚凱奏展歡酺詠
杖杜旋京吳

桐柏山

隋書樂志曰漢第三曲艾如張改為桐柏
山言武帝牧司王業彌章也

桐柏山淮之首肇基帝迹遂光區有大震邊闕殪獯醜
農既勸民惟阜穗充庭稼盈畝迨嘉辰慶芳糗納寒場
為春酒昭景福介肴壽天斯長地斯久化無極功無朽

道亡

隋書樂志曰漢第四曲上之回改為道亡
言道昏喪道義師起樊鄧也

道亡數極歸永元悠悠兆庶盡含冤沈河莫極皆無安
赴海誰授矯龍翰自樊漢仙波流水清且瀾救此倒懸
拯塗炭誓師劉旅赫靈斷率茲八百驅十亂登我聖明
由多難長夜杳冥忽云旦

忱威

隋書樂志曰漢第五曲擁離改為忱威言
破加湖元勲建也

忱威授律命蒼光

一作鬼

言薄加湖灌秋水迴瀾滌泊汎

增雄爭河投岸掬盈指犯刃嬰戈洞流矢資此威

一作威

烈齊文軌

漢東流

隋書樂志曰漢第六曲戰城南改為漢東
流言義師克魯山城也

漢東流江之內逆徒蜂聚旌旗紛蔽仰振威靈乘高騁
銳至仁解網窮鳥入懷因此龍躍言登泰階

鶴樓峻

晉書樂志曰漢第七曲巫山高改為鶴樓
峻言平郢城其威無敵也

鶴樓峻連翠微因巖設險池永歸肩亡齒懼薄言震耀
靈威凶衆稽顙天不能違金湯無所用功業長巍巍

昏主恣淫慝

隋書樂志曰漢第八曲上陵改為昏主恣
淫慝言東昏政亂武帝起義平九江姑熟
大破朱雀伐罪弔民也

昏主恣淫慝皆曰自昌盛上仁矜億兆誓師為請命既
齊丹浦戰又符甲子辰龕難伐有罪伐罪弔斯民悠悠
萬姓於此覩陽春

石首局

隋書樂志曰漢第九曲將進酒改為石首

局言義師平京城仍廢昏定大事也

石首局北墉堦新堞嚴東壘峻共表裏遙相鎮矢未飛
鼓方振競街壁並輿櫬酒池擾象廊震同伐謀兼善陳
闕應和掃煨燼翦庶惡靡餘胤

期運集

隋書樂志曰漢第十曲有所思改為期運
集言武帝膺錄受禪德盛化遠也

期運集惟皇膺

一作應

寶符龍躍清漢渚鳳起方

一作城南

隅謳歌共適夏獄訟兩違朱二儀啓佳

一作嘉

祚千載猶

旦暮舞蹈流帝功金玉

一作石

昭王度

於穆

隋書樂志曰漢第十一曲芳樹改為於穆

言大梁闡運君臣和樂休祚芳遠也

於穆君臣君臣和以樂關王道定天保樂均靈囿宴同

在錫前庭

一作庭前

懸鼓鐘左右列笙鏞纓佩俯仰有則備

禮容翔振鷺騁羣隆隆周何足擬遠與唐比蹤

惟大梁

隋書樂志曰漢第十二曲上邪改為惟大

梁言梁德廣運仁化洽也

惟大梁開運受錄膺

一作應

圖君八極

一作天冠八極

冠帶被五

都

一本無冠字

四海並和會排闕疑塞無異塗

隋凱樂歌辭

述帝德

於穆我皇膺哲欽明膺天之命載育羣生開元創歷邁

德垂聲朝宗萬寓祇事古靈煥乎皇道昭哉帝則惠政
滂流仁風四塞淮海未賓江湖背德運籌必勝濯征斯
克八荒霧卷四表雲褰雄圖盛略邁後光前寰區已泰
福祚方延長歌凱樂天子萬年

述諸軍用命

帝德遠覃天維宏布功高雲天聲隆韶護惟彼海隅未
從王度皇赫斯怒元戎啓路栢栢猛將趙趙英謀攻如
燎髮戰似摧枯救茲塗炭克彼妖逋塵清兩越氣靜三

吳鯨鯢已夷封疆載

一作在

闢班馬蕭蕭歸旌奕奕雲臺

表効司勲紀績業並山河道固金石

述天下太平

阪泉軒德丹浦堯勲始實以武終乃以文嘉樂聖主大
哉為君出師命將廓定重氛書軌既并干戈是戢弘風
設教政成人立禮樂聿興衣裳載緝風雲自美嘉祥爰
集皇皇聖政穆穆神猷牢籠虞夏度越姬劉日月比耀
天地同休永清四海長帝九州

唐凱樂歌辭

唐書樂志曰唐制凡命將出征有大功獻
浮鼓其凱樂用鐃吹二部樂器有笛篳篥
簫笳鐃鼓歌七種迭奏破陣樂等四曲一
破陣樂二應聖期三賀聖歡四君臣同慶
樂初太宗平東都破宋金剛其後蘇定方
執賀魯李勣平高麗皆備軍容凱歌以入
而貞觀顯慶開元禮並無儀注太常舊有

破陣樂應聖期兩曲歌辭至太和三年始
具儀注又補撰二曲為四曲云

受律辭元首相將討叛臣咸歌破陣樂共賞太平人

應聖期

聖德期昌運雍熙萬寓清乾坤資化育海嶽共休明闢
土欣耕稼銷戈遂偃兵殊方歌帝澤執贄賀昇平

賀聖歡

四海皇風被千年德水清戎衣更不著今日告成功

君臣同慶樂

主睭開昌歷臣忠奉大猷君看偃革後便是太平秋

唐凱歌六首

岑參

岑參送封大夫出師西征序曰天寶中匈奴回紇寇邊踰花門略金山烟塵相連侵軼海濱天子於是受鉞常清出師征之及破播仙奏捷獻凱參乃作凱歌云按唐書封常清傳曰開元末達奚背叛自黑山北

向西趣碎葉其後常清破賊有功天寶中
年又從高仙芝破小勃律不言播仙疑史
之闕文也

漢將承恩西破戎捷書先奏未央宮天子預開麟閣待
祇今誰數貳師功

官軍西出過樓蘭營幕傷臨月窟寒蒲海曉霜凝劒尾
蔥山夜雪撲旌竿

鳴笳擣鼓擁回軍破國平蕃昔未聞大夫鵲印搖邊月

金史卷之二十一
卷二十一
天將龍旗掣海雲

日落轅門鼓角鳴
千層面縛出蕃城
洗兵魚海雲迎陣
秣馬龍堆月照營

蕃軍遙見漢家營
滿谷連山徧哭聲
萬箭千刀一夜殺
平明流血浸空城

暮雨旌旗溼未乾
胡塵白草日光寒
昨夜將軍連曉戰
蕃軍只見馬空鞍

唐鼓吹鐃歌

柳宗元

唐鼓吹鐃歌十二曲柳宗元作以紀高祖
太宗功德及征伐勤勞之事一曰晉陽武
二曰獸之窟三曰戰虎牢四曰涇水黃五
曰奔鯨市六曰芭枿七曰河右平八曰鐵
山碎九曰靖本邦十曰吐谷渾十一曰高
昌十二曰東蠻按此諸曲史書不載疑宗
元私作而未嘗奏或雖奏而未嘗用故不
被於歌如何承天之造宋曲云

晉陽武

晉陽武言隋亂既極唐師起晉陽平姦豪
為生人義主以仁興武也第一

晉陽武奮義威煬之渝德焉歸氓畢屠綏者誰皇烈烈
專天機號以仁揚其旗日之昇九土晞斥田圻流洪輝
有其二翼餘隋斲梟驚連熊螭枯以肉勅者羸后土蕩
玄穹彌合之育莽然施惟德輔慶無期

晉陽武二十六句句三字

獸之窮

獸之窮言李密自邕山之敗其下皆貳霸
王之業知天授在唐遂歸於有道享我爵
命也第二

獸之窮奔大麓天厚黃德狙獷服甲之橐弓弭矢服皇
旅靖敵逾戚自亡其徒匪予戮屈贊猛虔慄慄縻以尺
組噉以秩黎之陽土茫茫富兵戎盈倉箱之者德莫能
享驅材兕授我疆

獸之窮二十一一句其十九句句三字三
句句四字

戰虎牢

戰虎牢言太宗師討王充實建德助逆師
奮擊武牢下擒之遂降充也第三

戰虎牢動河朔逆之助圖倚角怒穀靡抗喬嶽翹萌芽
傲霜電王謀內史申掌握鋪施芟夷二王縛憚華戎廓
封略命之晉卑以斲歸有德唯先覺

戰虎牢十八句其十六句句三字二句
句四字

涇水黃

涇水黃言薛舉據涇以死其子仁果尤勇
以暴師平之也第四

涇水黃龍野茫負太白騰天狼有老鷲立羽翼張鈎喙

決前鉅

一作距

超傍怒飛饑嘯翔不可當老雄死子復良

巢岐飲渭肆翱翔頓地絃提天綱列缺掉幟招搖耀鉞

鬼神來助夢嘉祥
腦塗原野魄飛揚
星辰復恢一方

涇水黃二十四句其十五句句三字九

句句四字

奔鯨沛

奔鯨沛言輔氏憑江淮竟東海命將平之

也第五

奔鯨沛盪海垠吐霓翳日腥浮雲帝怒下顧哀螫昏受
以神柄推元臣手援天矛截脩鱗披攘蒙霧開海門地

平水靜浮天垠義和顯耀乘清氛赫炎溥暢融大鈞

奔鯨沛十八句其十句句三字八句句

四字

芭枿

芭枿言梁之餘保荆衡巴巫窮南越良將
取之不以師也第六

芭枿黠矣惟根之蟠彌巴蔽荆負南極以安曰我舊梁
氏緝綏艱難江漢之阻都邑固以完聖人作神武用有

臣勇智奮不以衆投跡死地謀猷縱化敵為家慮則中
浩浩海裔不威而同係縲降王定厥功澶漫萬里宣唐
風蠻夷九譯咸來從凱旋金奏象形容震赫萬國罔不
龔

苞拊二十八句句其十六句句四字三句
句五字

河右平

河右平言李軌保河右師臨之不克變或

執以降也第七

河右澶漫頑為之魁王師如雷震崑崙以積上聳下聽
驚不可迴助讎抗有德惟人之災乃潰乃奮執縛歸厥
命萬室蒙其仁一夫則病濡以鴻澤皇之聖威畏德懷
功以定順之于理物咸遂厥性

河右平十八句句其十一句句四句五句
句五字二句句三字

鐵山碎

鐵山碑言突厥之大古夷狄莫彊焉師大破之降其國告于廟也第八

鐵山碑大漠舒二虜勁連穹廬背北海專坤隅歲來侵邊或傳于都天子命元帥奮其雄圖破定襄降魁渠窮竟窟宅斥余吾百蠻破膽邊氓蘇威武輝耀明鬼區利澤彌萬祀功不可踰官臣拜首惟帝之謨

鐵山碑二十二句其十一句句三字九句句四字二句句五字

靖本邦

靖本邦言劉武周敗裴寂咸有晉地太宗
滅之也第九

本邦伊晉惟時不靖根柢之搖枝葉攸病守臣不任勦
于神聖惟越之興翦焉則定洪惟我理式和以敬羣頑
既夷庶績咸正皇謦載大惟人之慶

靖本邦十四句句四字

吐谷渾

吐谷渾言李靖滅吐谷渾於西海上也第

十

吐谷渾盛彊背西海以夸歲侵擾我彊邊匿險且遐帝
謂神武師往征靖皇家烈烈旆其旗熊虎雜龍蛇王旅
千萬人銜枚默無譁東刃踰山徼張翼縱漠沙一舉刈
羶腥尸骸積如麻除惡務本根况敢遺萌芽洋洋西海
水威命窮天涯係虜來王都犒樂窮休嘉登高望還師
竟野如春華行者靡不歸親戚謹要遞凱旋獻清廟萬

國思無邪

吐谷渾二十六句句五字

高昌

高昌言李靖滅高昌也第十一

麴氏雄西北別絕臣外區
既恃遠且險縱傲不我虞
烈烈王者師熊螭以為徒
龍旂翻海浪駟騎馳坤隅
賁育搏嬰兒一掃不復餘
平沙際天極但見黃雲驅
臣靖執長纓智勇伏囚拘
文皇南面坐夷狄千羣趨
咸稱天子

神往古不得俱獻號天河汗以覆我國都兵戎不交害
各保性與軀

高昌二十二句句五字


東蠻

東蠻言既克東蠻羣臣請圖東蠻狀如周
書王會也第十二

東蠻有謝氏冠帶理海中自言我異世雖聖莫能通王
卒如飛翰鵬騫駭羣龍轟然自天墜乃信神武功繫虜

君臣人累累來自東無思不服從唐業如山崇百辟拜
稽首咸願圖形容如周王會書永永傳無窮睢盱萬狀
乖咿嘔九譯重廣輪撫四海浩浩知皇風歌詩鐃鼓間
以壯我元戎

東蠻二十句句五字



樂府詩集卷二十